

# Twee Hazelmuuskes

*Doar zaat'n twee hazelmuuskes  
Veschool'n tusken et ekkelblad  
En woch'n op et tweeduuster  
Want dan goat ze weer op pad.*

*Zee mostern oawer de boer'n  
Dee et maisgewas loat greuj'n  
En dat zee völle leever  
De koornbleumkes zaag'n bleuj'n.*

*,Ik snap nich,' zéé den oaldste,  
,Woar et oale spul toch blij,  
Want zölfs nen doodgewone réég'n buj  
Is a een en al vegif!'*

*Dat gung zo n'n tiedke wieder  
En zee dach'n nich an 't gevoar  
Dat oaweral op de loer lig  
Want n'n moez'n léév'n is zwoar.*

*Opees kwam oet de buske  
Nen groot'n voggel zo et leek  
En n'n jongst'n moes deuk engstig  
Tusken de blaar, en wör liekbleek*

*Efkes later, too 't weer biekwam  
Van den schrik en van 't gewééld  
Hef den oaldste moes an 't jongste  
Gewoon de woarheid éém vetééld.*

*,Wat doar vleug tusken de buske  
Heb ik aaltied a um lacht  
't Is mien breur en den is vleegeer  
Biej de Koonlijke Luchtmacht!'*

*Bennie Wesselink Sr.*